



Bosna i Hercegovina  
Federacija Bosne i Hercegovine  
Kantonalno tužilaštvo  
Kantona Sarajevo

Broj: T09 0 KTP 0094168 19  
Sarajevo, 29.03.2019. godine

UDRUŽENJE "EKO FORUM" ZENICA  
Ul. Meokušnice br.9  
72000 ZENICA

Na Vašu pritužbu koju ste podnijeli povodom donošenja Naredbe da se istraga neće provoditi protiv Đurić Branke, u svojstvu ministrice Federalnog ministarstva okoliša i turizma i Tirak Ibrahima, u svojstvu direktora Federalne uprave za inspeksijske poslove zbog krivičnog djela nesavjestan rad u službi iz čl. 387. st.2. u vezi sa st.1. KZ FBiH, obavještavamo Vas da je Ured Glavne kantonalne tužiteljice nakon razmatranja predmetnog spisa i Vaše pritužbe na gore navedenu odluku, istu pritužbu odbio kao neosnovanu, a iz slijedećih razloga:

U pritužbi se navodi da je stav tužilaštva neprihvatljiv, nezakonit i temeljen na površnom i pogrešnom razumijevanju stvari te da je olako zauzet stav da se istraga obustavi. Zatim se navodi da je i Kantonalno tužilaštvo ZE-DO Kantona donijelo naredbu o neprovođenju istrage protiv društva ArcelorMittal d.o.o. Zenica i odgovornih lica ovog društva po pitanju zagađenosti zraka, vode i tla, a da je po istom pitanju Kantonalno tužilaštvo Tuzlanskog kantona otvorilo istragu protiv odgovornih lica GIKIL d.o.o. u Lukavcu. Nadalje se iznose činjenice navedene u krivičnoj prijavi, vrši ocjena iskaza svjedoka prema viđenju podnosioca prijave, te se predlaže da se otvori istraga sa ozbiljnim pristupom uz angažovanje vještaka ili instituta.

Ured Glavne tužiteljice je nakon uvida u kompletan spis broj gornji, a naročito u dokaze koje je cijenio postupajući tužilac, utvrdio da je odluka postupajućeg tužioca da se istraga neće provoditi pravilna i zakonita.

Izvršenim uvidom u spis je utvrđeno da su tokom postupka u svojstvu svjedoka saslušani Lemeš Samir, Mehmed Cero, Mladen Rudež, Kulin Ibro, Mirsad Smailagić, Mediha Mlačo, Ljuba Tadić, Azra Sivro, prijavljeni Branka Đurić i Tirak Ibrahim, izvršen uvid u zapisnik Federalnog ministarstva okoliša i turizma od 20.11.2013.godine, Akt Kantonalnog tužilaštva ZDK Kantona broj: T04 0 KT 0023516 15 od 16.04.2018. godine i više prekršajnih naloga, te je zaključeno da se u radnjama prijavljenih lica nisu ostvarili elementi bića nekog djela propisanog KZFBiH.

Naime, preduzetim radnjama od strane postupajućeg tužitelja u konkretnom slučaju su utvrđene sve okolnosti vezane za navode krivične prijave i druge sumnje na koje



se ukazuje navedenom pritužbom, a u donesenoj odluci da se istraga neće provoditi detaljno su izložene sve odlučne činjenice utvrđene tokom prethodnih provjera navoda prijave i dati razlozi za njeno donošenje. Tako je pravilno zaključeno da se polazeći od sljedećih činjenica vezanih za izdavanja okolišnih dozvola i to: da je privredno društvo pod nazivom Mittal steel Zenica d.o.o. dana 23.01.2006. godine, zatražilo izdavanje okolišne dozvole od nadležnog organa Vlade FBiH na temelju „Plana aktivnosti“ kojim su predviđene mjere i rokovi za postupno smanjenje zagađenja iz pogona i postrojenja kojima su izdate dozvole za rad prije stupanja na snagu Zakona o zaštiti okoliša; da je u vezi s tim nadležno Ministarstvo zatražilo od ArcelorMittal Zenica, da dostave planove aktivnosti za svaki pojedinačni pogon koji su nakon dostavljanja analizirani od strane Ministarstva u saradnji sa stručnom komisijom od 30 članova, te su nakon donošenja konačne odluke o prihvatljivosti izdate okolišne dozvole na period od 5 godina; da je ArcelorMittal Zenica u 2008. godini, revitalizirao pogone koji su mirovali 17 godina nakon čega je pokrenuta integralna proizvodnja; da je ArcelorMittal Zenica prije isteka važnosti okolišnih dozvola dana 10.09.2014. godine dostavio Ministarstvu zahtjev za njihovu obnovu, te nakon što je zahtjev dopunjen u skladu sa uputstvima datim od strane Ministarstva postupci su spojeni u jedan upravni postupak pod brojem UPI 05/2-23-11-133/14 za izdavanje jedne okolišne dozvole u skladu sa Zakonom o izmjenama i dopunama Zakona o zaštiti okoliša, izuzev za pogone Čeličana BOF i Čeličana EAF za koje je vođen zaseban postupak, te su okolišne dozvole izdate krajem 2015. godine; da je ArcelorMittal Zenica u osmom mjesecu 2016. godine, podnio zahtjev za izdavanje integralne okolišne dozvole za sve pogone i postrojenja na osnovu kojeg zahtjeva je Ministarstvo dana 03.04.2017. godine, izdalo integralnu okolišnu dozvolu za sve pogone; da je Ministarstvo imenovalo stručnu komisiju za kontrolu realizacije obaveza utvrđenih okolišnim dozvolama, koja komisija je nakon obilaska pogona u periodu od 08. do 29.04.2013. godine i pregleda relevantne dokumentacije zatražila od društva ArcelorMittal Zenica da izradi detaljnije matične kartone svih nerealiziranih projekata sa obrazloženim razlozima kašnjenja; da je potom ArcelorMittal Zenica napravio tražene pojedinačne kartone sa stanjem na dan 07.10.2013. godine, a posebno na dan 24.10.2013. godine, za pogon Aglomeracija u vezi sa rekonstrukcijom „ESP“. Komisija je Ministarstvu dostavila ovaj izvještaj sa priloženim kartonima nerealiziranih projekata, te je dat zaključak Komisije da je ArcelorMittal Zenica od ukupno 200 mjera utvrđenim okolišnim dozvolama u potpunosti proveo 186 mjera da su 2 mjere djelimično provedene, a da 12 mjera nije realizirano, te da nerealizirane mjere predstavljaju krupne investicione zahvate i suštinski bi trebale imati najveći uticaj na smanjenje zagađenja okoliša; da je Ministarstvo izvještaj komisije dana 16.11.2013. godine dostavilo Vladi FBiH, a dana 20.11.2013. godine održan je sastanak sa predstavnicima ArcelorMittal Zenica, na kojem je još jednom izvršena detaljna analiza kartona projekata nerealiziranih mjera



iz okolišnih dozvola, te je ministarstvo prihvatilo nove rokove za realizaciju; da je na temelju Odluke Vlade FBiH broj 1617/2013 od 30.12.2013. godine potpisan Memorandum o razumijevanju kojim je potvrđeno da su kartoni projekata prihvatljivi uključujući nove rokove za realiziranje mjera; da je ispoštovana zakonska procedura u vezi sa postupkom podnošenja zahtjeva za izdavanje okolišne dozvole društvu ArcelorMittal Zenica zajedno sa planovima aktivnosti koje sadrže mjere i rokove za postupno smanjenje emisija odnosno zagađenja i za usaglašavanje sa najboljim raspoloživim tehnikama; da u vezi rada postrojenja bez okolišnih dozvola, u periodu od 02.12.2014. godine do kraja 2015. godine za pogone Čeličana BOF, Čeličana EAP, a za ostale pogone od 02.12.2014. godine, odnosno od 24.11.2015. godine, pa do izdavanja integralne okolišne dozvole 03.04.2017.godine, ti propusti odgovornih lica ArcelorMittal Zenica, u smislu člana 116. Zakona o zaštiti okoliša imaju prekršajni karakter - u radnjama prijavljene ministrice Branke Đurić nisu ostvarili elementi bića nekog krivičnog djela propisanog KZ F BiH. Naime, potpisivanju Memoranduma o međusobnom razumijevanju iz januara 2014. godine je prethodio izvještaj stručne komisije i Odluka Vlade FBiH broj 1617/2013 od 30.12.2013. godine, čime se pokušalo naći rješenja za koje su se Ministarstvo odnosno Vlada FBiH opredjelili, kako bi se u prihvatljivom periodu Arcelor Mittal Zenica prilagodio tada raspoloživim tehnikama za dostizanje ciljnih emisija.

Isto tako polazeći od činjenice da je federalni inspektor zaštite okoliša, Ibro Kulin, vršio inspeksijske nadzore u ArcelorMittal Zenica u 2010., 2011. i 2012. godini, da je Mediha Mlaćo, po Odluci Vlade FBiH u Uredu u Zenici, u periodu od 01.01.2013. do 23.02.2015. godine, obavljala dužnost federalnog inspektora za zaštitu okoliša, da je Ljuba Tadić, vršila inspeksijske nadzore u ArcelorMittal Zenica u periodu od 07.04.2015 -31.12.2016. godine, a što je potvrđeno i dokumentacijom o poduzetim mjerama ovog organa, pa kako je vršen kontinuirani inspeksijski nadzor nad pogonima Koksara, Aglomeracija, Energetika, Visoka peć, Čeličana BOF i Valjaonica, i kako su nalagane upravne mjere, izdavani prekršajni nalozi, odnosno podnošeni zahtjevi nadležnom sudu za pokretanje prekršajnog postupka, to prijavljeno odgovorno lice Federalne uprave za inspedcijske poslove nije počinilo krivično djelo za koje je prijavljen. Ovo svakako imajući u vidu da je periodu 2005-2017. godina društvo Arcelor Mittal Zenica uložilo 84,61 miliona KM u svrhu zaštite okoliša i ispunjenja mjera i uvjeta iz okolišnih dozvola, te da su u fazi realizacije projekti: Sekundarno otprašivanje na Čeličani vrijednosti 10,76 miliona KM, Novi hibridni filter na sinter mašini br. 6 vrijednosti 5,87 miliona KM, Energetika- nova zajednička kompanija na bazi gasnih kotlova vrijednosti 103,66 miliona KM, Ugradnja AMS na koksari, Aglomeraciji, Visokoj peći, BOF Čeličani vrijednosti 1,44 miliona KM. Također iz uvida u pregled ulaganja u zaštitu okoliša proizilazi da je investirano dodatnih 15,7 miliona KM za projekte koji nisu naređeni okolišnim dozvolama.

Sve ovo imajući u vidu i da je Kantonalno tužilaštva ZDK Kantona pod brojem:T04 0 KT 0023516 15 od 13.02.2018. godine, donijelo Naredbu de se istraga neće provoditi protiv privrednog društva „ARCELOR MITTAL“ d.o.o. Zenica, Palavathu Krishan Nair Bijju i Mukund Vyankatesh Kulkarni, odgovornih lica AMZ-a zbog krivičnog djela onečišćenje okoliša iz člana 303. st.1. i 2. KZ FBiH, i krivičnog djela ugrožavanje okoliša napravama iz člana 304. KZ FBiH, jer ne postoje osnovi sumnje da su prijavljeni počinili navedena krivična djela, odnosno da ne postoje osnovi odgovornosti pravne osobe u smislu člana 128. KZ FBiH.

Kako u pritužbi nisu istaknute nove okolnosti koje ranije nisu bile navedene, niti su ponuđeni novi dokazi koji bi mogli izazvati sumnju u pravilnost donesene tužilačke odluke, to je pritužba odbijena kao neosnovana, a odluka postupajućeg tužioca prihvaćena kao pravilna i zakonita.

Ujedno Vas obavještavamo da u smislu odredbi člana 9. stav 1. u vezi sa članom 20. stav 1. Zakona o Federalnom tužilaštvu F BiH, možete podnijeti pritužbu Federalnom tužilaštvu F BiH radi ispitivanja da li je u konkretnom krivičnom predmetu pravilno primjenjen krivični zakon.

GLAVNA KANTONALNA TUŽITELJICA



Dalida Burzić